

湖南苗防屯政考

湖南苗防屯政考

湖南苗防屯政考卷十四



二品銜前署湖南辰永沅靖道但湘良纂

學校

部覆鳳乾永保四廳縣士子苗生鄉試另編字號

嘉慶十三年三月准

禮部謹

奏爲遵

旨議奏事內閣鈔出湖南巡撫景安會同學政李宗瀚奏請將苗疆士子及苗生等鄉試另編字號分別取中一摺奉

硃批禮部議奏欽此欽遵鈔出到部查原奏內稱苗疆鳳凰乾州永綏

三廳並永順府屬之保靖一縣僻在邊隅向係改土歸流雖設學
年久而鳳凰永綏保靖兩廳一縣至今尙未開科惟乾州於乾隆
辛卯科中式舉人一名胡啟文丙午科中式舉人一名張秩然皆
係寄籍其土著民人並未有能領鄉薦者嗣於乾隆六十年該廳
士民均遭苗擾自戡定後修建碣卡均田屯勇爲長治久安之計
皆能捐產急公共明大義今丁卯科鳳凰乾州永綏三廳保靖一
縣鄉試者爲數較增但苗疆士子魯樸者多與通省諸生校藝難
以獲售請照四川甯遠府另編甯字號之例數至三十名以上另
編邊字號於本省額內取中一名又該四廳縣多係生苗地險巢
深歷來反覆無常迥非永順寶慶靖州及黔粵兩省苗人可比查

鳳凰乾州永綏三廳歲科兩試各額進苗童二名保靖苗童亦附入民籍應試近科鄉試之士亦多而未能與通省人材校藝獲售轉恐阻其向上之心請將該四廳縣苗生照臺灣府另編至字號之例另編田字號仍照雲南等省順天鄉試另編中皿字號之例於十五名內額外取中一名等語臣等伏思鄉試爲掄才大典未可倖邀而邊郡文風亦宜隨時振作以廣

皇仁查例載四川甯遠府應試士子因邊遠地方難以獲售經臣部議

准照甘肅甯夏府另編字號取中之例數至三十名以上者另編甯字號於本省額內取中一名等語今湖南鳳凰乾州永綏三廳保靖一縣僻在苗疆文風舛陋現據該巡撫等聲稱該廳縣士子

自戡定苗疆以後於修卡均田各事宜皆能急公向義而每逢鄉試從未獲售不足以示鼓勵應請如該巡撫等所奏嗣後鳳凰乾州永綏三廳並永順府屬之保靖一縣應試士子准其照四川甯遠府另編字號取中之例數至三十名以上者另編爲邊字號於本省額內准取中一名如不及三十名仍歸通省取中無庸另編字號至鳳凰乾州永綏保靖四廳縣苗生現據該巡撫等聲稱該苗民素稱反覆迥非他府廳州縣及黔粵兩省苗人可比向來歲科額進新童及附民籍考試者已不乏人近皆慕化讀書然與通省士子校藝自屬有失無得無以堅其向上之心亦應如該巡撫等所請准其照福建臺灣府另編字號額外取中之例另編田字

號取中惟該巡撫等請照中皿字號十五名取中一名查中皿字號現已改爲二十名取中一名第該巡撫究爲鼓勵苗生起見卽應如所請准其於應試人數在十五名以上者額外取中一名如不足十五名仍附通省取中毋庸另編字號卽將來應試人多亦不得於額外加取以示限制仍令主考官於苗疆士子及苗生應試文藝核其果係明順者照額取中再該四廳縣旣經另編字號恐有他處民人託名苗疆苗生希圖僥倖者應飭該地方官嚴行查禁違者從重治罪自足以杜冒濫而昭慎重所有臣等酌議緣由是否有當伏候

欽定嘉慶十三年二月二十日奉

旨依議欽此

詳鳳乾永保四廳縣紳士呈請詳題謝

恩嘉慶十三年

爲邊學另設中額恭謝

辰沅道姚興潔

天恩呈請詳題事案據鳳凰同知姚興潔署乾州廳同知李方穀永綏
廳同知胡如沅保靖縣知縣高誠會詳據紳士趙地靈包明漢曾
世崧蕭榮科胡學文尙法型鄧士儼向昕饒桂何楷艾建洵鄧之
相朱煊姚柱吳太勳胡大魁王長錫黃士莊賈雲章等呈稱欽惟
聖治光昭四海戴

生成之德

皇恩遐布萬方慶登進之榮棘闡榜放春秋搜俊良而入選省會地分

大小衡材藝以題名既中多中少之殊程亦因地因材而設額

聖天子振興文教

嘉惠士林

典至隆也

恩至渥也生等地處五溪之徼學疏二酉之藏亦慕登雲無柰月宮路
遠未工織錦敢云日色目迷歎鶚薦之無期邊境之文星似暗當
苗氛之初靖藝林之學殖更荒仰蒙我

皇上耆定武功

誕敷文德干戈戢則禮樂以興屯防周而膠庠徧設千餘座礪樓前後
帖曄相聞七百程寨落生童扶搖有志欣荷

恩逾恆格

俯俞入告之謨

澤沛荒隅

廣闢升騰之路編號邊田兩字

特恩及一縣三廳取材無西五溪中額殊四州九府邊士三十名應試

定分蟾窟一枝苗生三五人赴科亦附鹿鳴一座此我

國家作人之

盛典實邊防下士之奇逢也從此虎化變山趁風雪而燒尾魚遊向水

得雲雨而揚鬐岩疆播紅杏之吟鳥道有青雲之級此日窮邊草

木

栽培盡南國梗枏當年礙道荆榛次第作春官桃李生等素切龍門之願幸沐

甄陶仰承

鳳詔之頒益加淬礪所有生等感激下忱理合具呈叩請俯賜據情轉詳具題施行等情據此該鳳凰廳同知姚興潔署乾州廳同知李方穀永綏廳同知胡如沅保靖縣知縣高誠會看得該士子苗生等籍隸楚邊躬逢

盛世恥居僻陋莫鍾靈淑於山川快覩威儀初幸湔洗夫心面欽惟我皇上義圖延慶

軒紀綿庥

聲教覃敷化行禹甸周原而外

文章丕煥光被堯天舜日之中說禮樂而敦詩書荒徼之儒風乍振遊
黨庠而歸術序新流之學業方勤乃志切探花明晤粗解文非拔
萃瑁璫徒嗟何幸

聖量恢宏

皇恩霽霽率舊章於甯夏潛溫黍穀之吹仿成例於臺灣同燒龍門之
尾材慚樗櫟合澧蘭沅芷而敷榮質類砒砑偕和璞楚珩而增耀
從此香分月殿看衣白苧之衫亦得試赴春官冀食紅綾之餅實
出

殊榮之作育誠爲異數之遭逢茲據該紳士等具呈前來理合據情詳

請咨 題等情到道據此該兼護辰永沅靖道事鳳凰廳同知姚
興潔覆看得各該廳縣士子苗生等欣逢

景運幸際

熙朝沐

聖教之涵濡濯磨有自荷

湛恩之汪濊頂感難名欽惟我

皇上醲化覃敷

大鈞洪育含

太和而保合

德懋作人覩

文治之光昌

典隆造士苗疆底定既賣劍而買牛屯政初開復橫經而負耒惟未工
雲錦青衫則歲歲堪憐錯擲機梭花樣則年年難合何幸量材錄
取益贊甫陳

逾格搜羅

堯俞卽下人雖魯樸無虞葑菲之遺學本荒蕪得與參苓之選數百里
榛區狃境氣翊風雲千萬年僻壤荒陬光開日月榱桷杞梓都成
楚國之良珪璧璫璵盡是荆山之美此固八埏九窩共頌

皇仁豈惟二酉五溪益加鼓勵

興潔

躬膺邊要恭奉

絲綸

恩自

天來等諸生而誌慶感同身受代下悃以陳詞茲據鳳乾永保四廳縣
詳據紳士等呈請代詳前來理合據情詳請察核詳題

部覆保靖縣添設苗童進額一名

嘉慶十七年九月准咨

禮部謹

奏爲遵

旨議奏事內閣鈔出湖南學政湯金釗會同巡撫廣厚奏邊隅苗童應試請添設學額一摺奉

硃批禮部議奏欽此欽遵到部查原奏內稱保靖縣屬苗民前經奏准與乾州鳳凰永綏三廳苗童一律設立書院每科鄉試苗生數在十五名以上編田字號取中一名該縣苗眾益知向善現在赴館誦讀者共有二百餘名將來應試之人自當日漸加增惟附於民籍取進風簷校藝究與民童有間歷來取進乏人是以戊辰庚午